

Asisko gutuna

2009ko urria. 4. printzipioa: Bidea elkarrekin egin,

anaitasunez bizi.

12. zenbakia

Asis Sarea eguneroko bizimoduan espiritualtasun frantziskotarra ezagutu edo partekatu nahi duten lagunen sare sozial irekia da.

Asisko gutunaren 12. zenbakiarekin, urtebete egiten du Sareak. Aldi honetan, gero eta jende gehiago joan da Sarea ezagutzuz, eta dagoeneko 1.300 baino gehiago lagun ditu eta 19 tokitan egiten da hileroko otoitz topaketa. Gutunaren harpidetza eta hileroko otoitz topaketa dira laugarren printzipioaren (senidetasuna)

irizpide praktikoak, hil honetan berorri ematen diogularik txanda. Sare honetan esku hartzen dutenen senidetasun-esperientzia, honetan mamitzen da: sarea ezagutarazteko ahaleginean, hileko otoitz topaketan parte hartzeko gonbitea zabaltzean, edo otoitz topaketa beste auzotan abian jartzera bultzatzean.

Gogoetarako gaia

Anaitasuna eguneroko bizitzan

Senidetasunezko mundua, denak anai-arreba diren mundua, horixe izan da gizadiaren ametsa mendez mende, beti utopia eta beti desira den mezua. Badu zerikusirik gurekin eta gure eguneroko bizitzarekin?

Gure bizitzak geureak direnengan du zentroa. Geurea denaz kezkatuz gabiltza, komeni zaigunari etekinik handiena atereaz. Hauek dira geure helburuak: geure burua zaindu, ondo sentitu, ondo bizi, geure osasuna, geure janariak, geurearekin zerikusia dezan guztiaren arreta izan, neure bizitza, neureak ditudanak, neure interesak... nolana ere neu aurrera atera; geure etxeko atea itxirik eta kanpora beldurrez begiratu. Eta krisiak sortzen digun segurtasun faltarekin, dena larriagoa egiten da.

Bizitzak gutako bakoitzaren esku jartzen ditu eginkizunak eta pertsonak; horiek gure erantzukizun dira eta berorietaz hartzen dugu ardura. Baina une horietan hau da gure joera: gero eta txikiagoa egin zirkulua, bizitzak gure esku uzten dituen eginkizunen eta pertsonen zirkulua.

Enplega gaitezke geure gauzetan bakarrik? Geureak diren pertsonengan bakarrik? Desira dezakegu mundu senidetuago bat, geure erantzukizunak zirkulurik txikienera murriztuz?

Ebanjelioak itxaropen handi bat dakar berekin: Jainkoaren maitasuna. Denok berdin maite gaituen eta denok anai-arreba garela dioen Jainkoagan itxaropen izatea. Jesus, mostaza-haziaren antza duen Jainkoerreinuaz mintzo zaigu, adar handiak ematen dituen hazirik txikienaren antzekoaz; maitasuna hazten eta ugaltzen duen Jainkoaren erreinuaz.

Senidetasuna bizi nahi badugu, zabaldu egin beharko dugu geureak diren zirkulua eta ikusi, zer eta nor gehiago hartzen dugun geure esku. Geure etxeko sarrailatik ez, baina leihotik begiratu eta ikusi nor eta zer dagoen kanpoan. Frantziskok dioen bezala, "Jaunaren Espirituaren bila ibili eta haren ekintza santua praktikatu"; geure baitatik ateratzen laguntzen digun Jainko-maitasunaren bila ibili eta haratago begiratu, zein ekintza gelditzen den gure esku, eta nola enplega dezakegun geure energiaren parte bat gizatasuna, senidetasuna, zabaltzeko.

Egunean eguneko senidetasunak berekin du, gure esku gelditzen diren zirkulua zabaltzea, geure bizitza eta bihotza besteei irekitzea, horrela denok egiaz anai-arreba izan gaitezkeen asmo horretara hurbilduz joateko.

Ebanjelioko pasartea: Lk 6, 27-38

«Zuei, entzuleoi, hau diotsuet: Maitatu etsaiak, egin ongi gorroto dizuetenei, bedeinkatu madarikatzen zaituztetenak, egin otoitz izen ona kentzen dizuetenen alde. «Masail batean jotzen zaituenari eskaini bestea ere; soingainekoa kentzen dizunari, ez ukatu soinekoka ere. Eskatzen dizun edonori, eman, eta zeurea kentzen dizunari, ez bihurtarazi. Eta besteek zuei egitea nahi duzuen, egin zuek ere besteei. «Maite zaituztetenak bakarrik maite badituzue, zer esker on zor zaizue? Bekatariak ere maite dituzte beren maitaleak. Eta ongi

egiten dizuetenei bakarrik egiten badiezue ongi, zer esker on zor zaizue? Bekatariak ere egiten dute beste horrenbeste. Eta ordaina hartzekotan bakarrik ematen baduzue maileguz, zer esker on zor zaizue? Bekatariak ere aurreratu ohi diote elkarri, beste hainbeste hartzekotan. Ez! Zuek maitatu etsaiak, egin ongi eta eman maileguz ordainari begiratu gabe: handia izango da zuen saria eta Goi-goikoaren seme-alaba izango zarete, ona baita bera esker txarreko eta gaiztoentzat. Izan zaitezte errukitsuak, zuen Aita errukitsua den bezala.

Espiritualtasun frantziskotarra: "El hermano de Asís" liburutik. I. Larrañaga

"Asisera heldu zenean, legenardunengana joan zen. Jaunarengandik jaso izan zuen samurtasuna sufritu zutenei guztiz emateko akumulatuta zeukan. Beharra zen. Egun batzuk pasatu zituen haien artean. Maitasuna sortzen zitzaion: oinak garbitu zizkieten, zauriak bendatu, eskatak kendu. Zauriak garbitzean, adiguriz ukitu zizkieten, mina saihesteko. Bakoitzaren nahiak bazekizkien. Gaixo bakoitzaren historia pertsonala ikasi izan zuen."

Sal 145, 1-3. 8-10. 14-18. 21

Goratuko zaitut, ene Jainko,
zure izena beti bedeinkatuko.
Egunero bedeinkatuko zaitut,
zure izena beti goretsiko!

Handia da Jauna, guztiz goresgarria,
ulermenaz gaindikoa haren handitasuna.

Errukiorra eta bihozbera da Jauna,
haserregaitza eta onginali handikoa.
Ona da Jauna guztientzat,
gupidaz betea bere sorkari guztientzat.

Gorets zaitzatela, Jauna, zeure sorkari guztiak,
bedeinka zeure fededunek!

Erortzear direnei Jaunak die eusten,
lur joak ditu altxatzen.
Zuri begira daude denak zain,
eta zuk jaten ematen diezu bere garaian;
eskua zabaldu eta bizidun oro onginali asetzen duzu.

Zuzena da Jauna jokabide guztietan,
leiala egintza guztietan.

Hurbil da Jauna dei egiten diotenengandik,
benetan dei egiten diotenengandik.
Egin beza nire ahoak
Jaunaren gorespena eta bedeinka bezate
izaki guztiak haren izen santua
beti eta beti!

Gutuneko azken hitzak

Maitasunarena bakarrik da sekretu hau: errealitatea eta eguneroko gauzak, imajinaturiko ideala baino aberatsagotzat estimatzea eta bizitzea.

2009ko azaroko eguneroko ebanjelioa

Egunero Ebanjelioa irakurri nahi duten lagunek, egun bakoitzari dagozkion irakurgaien arabera, hemen dauzkate azaroko erreferentzia guztiak:

1 Mt 5,1-12a	7 Lk 16,9-15	13 Lk 17,26-37	19 Lk 19,41-44	25 Lk 21, 12-19
2 Mk 15,33-39;16,1-6	8 Mk 12, 38-44	14 Lk 18,1-8	20 Lk 19, 45-48	26 Lk 21,20-28
3 Lk 14,15-24	9 Lk 17, 1-6	15 Mk 13, 24-32	21 Lk 20,27-40	27 Lk 21,29-33
4 Lk 14,25-33	10 Lk 17,7-10	16 Lk 18,35-43	22 Jn 18, 33b-37	28 Lk 21,34-36
5 Lk 15,1-10	11 Lk 17,11-19	17 Lk 19,1-10	23 Lk 21,1-4	29 Lk 21, 25-28. 34-36
6 Lk 16,1-8	12 Lk 17,20-25	18 Lk 19,11-28	24 Lk 21,5-11	30 Mt 4,18-22

Oharrak:

Asis Sarearen ezaugarri nagusia da irekia izan nahi duela eta bere asmoa biderkatzea. Irekitasun hau sarean parte hartzen dugun bakoitzari egitea dagokigu. Guztiok biderka dezakegu Asis Sarea, hileroko Gutun hau jasotzera edo hileroko azken ostegunetan 19.30ean, ohiko lekuetan, ospatzen dugun otoitzaldian parte hartzera nor gonbida dezakegun pentsatuz.

Asis Sareari buruzko informazioa hartu nahi izanez gero, edo gutun hau hileroko hartzeko izen emateko, deitu 646-214896 telefono zenbakira edo bidali mezua asissarea@arantzazu.org helbide elektronikora.

Asisko Gutunaz, bakarka nahiz taldean lan egiteko iradokizunak

Asisko gutuna

2009ko urria. 4. printzipioa. Bidea elkarrekin egin.

anaitasunez bizi

12. zenbakia

Hil honetan Asis Sarearen laugarren printzipiora gatoz berriro. Bertan gonbitea egiten zaigu geure eguneroko harremani begira jartzera, geure zailtasunak, bai eta lorpenak ere, kontuan hartzera. Gauza eta pertsona guztiak Jesuen begiradatik ikustera gonbidatuak gaude.

Anaitasuna eguneroko bizitzan

Senide arteko mundua, denok anai-arreba gaitzen mundua... zer esnatzen du zuregan hainbeste gizaldirako utopia eta desira honek?

Begira berriro zeure bizitzari: zeren eta noren inguruan dabilta zure kezka? Zein pertsonak osatzen dute zeure zirkulua? Nolako erantzukizunean sentitzen zara haietako bakoitzarekin? Betikoak al dira, agian, "zeureak"?

Jar zaitez zeure pertsonen zirkuluaren aurrean eta zoaz berori norekin zabal dezakezun ikusten: azokan kasu egiten dizutenak, auzokoak, zeure bailarako emigratzaileak... Har ezazu kontuan Jainkoak Jesusengan agerturiko maitasuna eta Jesusek nahi zuen senidetasunezko gizadia... zer esnatzen da zuregan pertsona hauen aurrean? Zerbait egitera bultzatzen zaituela sentitzen al duzu?

Eska iezaiozu Jainkoari, lagun zaitzala zeure baitatik ateratzen eta hunki zaitzaten pertsonen zirkulua zabaltzen. Zure bihotza gero eta pertsona gehiagori irekitzea, giza senidetasuna eraikitzen elkarlana egiteko modu bat izango duzu.

"Joka ezazue besteekin, haiek zuekin jokatzera nahiko zenuketen bezala..."

Ebanjelioko exijentziarik handieneko testu baten aurrean gaude: ze sentimendu sortzen ditu zuregan?

Esaten duena baino haratago, sumatzen duzu testuaren barne dinamika?

"*Esker txarreko eta gaiztoentzat ere ona den*" Aitarene maitasun gupidatsua da irizpide, ez gutxiago. Horrek, zeure besteekiko begirada aldatzera eramaten zaitu?

"Frantziskok ikasia zuen gaixo bakoitzaren historia pertsonala"

Frantziskoren bizitzako pasarte honetan argi eta garbi ikusten dugu zein dinamikatarra gauden deituak: gure pertsonen zirkulutik kanpora beste batzuegana, batez ere premia handian daudenengana, hurbilduz joatea.

Frantziskoren garaian, gizartean lepradunak ziren baztertuenak, azkenak. Bera haiengana doa, zaindu egiten ditu, nolabait beren duintasuna itzultzen die, gizarteak kendu zien duintasuna; haien anaia izanez, senidetasunaren proiektua eraikiz doa.

Bestelako "*lepradunik*" ezagutzen duzu? Frantziskoren esperientziak ematen dizu argi izpiren bat?

"Jauna errukiorra da guztiekin..."

Gogoetak, denok era berean maite gaituen Jainkoaren maitasuna aipatzen zuen. Salmoak era bete-betea adierazten zuen.

Jainkoa goretsiz hasten eta amaitzen da salmoa; gupida, pazientzia, onginahi, txera, leialtasun egiten den Jainkoaren maitasunaren aurrean esker onez sentitzen den bihotzaz goretsiz, alegia.

Irakur ezazu salmoa poliki-poliki ... zer esnatzen du zure baitan? Zeure bizitzan, zertan sumatu duzu eta sumatzen duzu Jainkoaren maitasuna? Nola kokatzen zaitu besteen aurrean: zirkulurik gertueneko pertsonen aurrean eta zuregandik urrutiagokoen aurrean?

Utz ezazu zure baitan ere esker onezko alabantza sortzen.